

Фермин кӧдлмшчнрин хургт

Шидр, Приозерненск района „Сарпа“ совхозин, дӧрвдгч фермд хӧбчнрин хург болв. Фермин управляющ ӱр Бабаев К. Советск Союзин Коммунистическ партин Центральн Комитет болн СССР-н Министрмӱдин Советин, январь сард гаргъсн дуудвриг цӱалгъдж ӧгӱд, ӧнӱгрсн 1957 джил совхозин кедж-кӱцӱсн кӧдлмшин ашин тускар доклад кев.

Хургт ӱг келцхӱсн совхозин ах зоотехник ӱр Богомолов, эклц парторганизацин сеглӱтр ӱр Даргаев нань чигн улс хӧбгӱан ӱвлӱс ягъдж таргън-цадхлнӱгар авч гарх, цевр-цеерӱр, цаглань нӱдн деерк ноос киргъдж, амн-хамринь цеврлджӱхин тускар, февралин тӱрӱн ӧрӱлд хургълх зӧвтӱ 8 отар хӧбдт ода-нас кӧдлх улс белдхин тускар селвгӱан ӧгцхӱв. Совхо-

зин ӱкрчнрт болн хӧбчнрт, медрлинь ӧдлӱлхин тӧлӱ сард хойр дакдж зоотехническ сургъуль дасххмн гидж келцхӱв. Дакад совхозин кӧдлӱчнриг темсӱр теткхин тӧлӱд темс элвгӱр тӱрхмн гидж заацхав.

Коммунистическ партин ЦК-н болн СССР-н Министрмӱдин Советин дуудврин хӱрӱд болн СССР-н Деед Советд сунъгъвр уктдж фермин хӧбчнр бийсдӱн ӧдӱн даалгъвр авцхав.

Ах хӧбчнр Лисицк 6-н Сундитов хӧн болгънас 6 килограмм ноос киргъдж авнавдн, 100 хӧбнӱс 120 хургъ авнавдн гидж даалгъвр авцхав.

Ах хӧбч В. Бабаков ирг хӧн болгънас 8,5 килограмм ноос киргъдж авнав гидж даалгъвр авб.